



Sud Bosne i Hercegovine
Суд Босне и Херцеговине

Broj: S1 3 IŽ 039148 20 IŽ
Sarajevo, 14.12.2020. godine

Sud Bosne i Hercegovine, u drugostepenom vijeću sastavljenom od sudija Zvezdane Antonović, kao predsjednika vijeća, Dr Branka Moraita i Mirsade Džindo, kao članova vijeća, odlučujući o žalbi Stranke demokratske akcije (SDA), Sarajevo, Mehmeda Spahe 14, zastupana po ovlaštenom licu, generalnom sekretaru, dr Halidu Genjcu, koja osporava Odluku Centralne izborne komisije BiH o odbijanju zahtjeva za ponovno brojanje glasačkih listića u osnovnoj izbornoj jedinici Gacko za nivo Skupštinu opštine Gacko, broj 05-1-07-5-1553/20 od 09.12.2020. godine, u nejavnoj sjednici, održanoj dana 14.12.2020. godine, donio je

R J E Š E N J E

Žalba se odbija.

O b r a z l o Ź e n j e

Odlukom Centralne izborne komisije Bosne i Hercegovine, broj i datum u uvodu, odbijen je kao neosnovan zahtjev političkog subjekta SDA za ponovno brojanje glasačkih listića pristiglih putem pošte u osnovnoj izbornoj jedinici Gacko.

Protiv ove odluke žalitelj SP je izjavio žalbu zbog povrede zakona i pravila izbornog procesa, nepotpuno i nepravilno utvrđenog činjeničnog stanja i pogrešne primjene materijalnog prava. Žalbom ukazuje da je njihov zahtjev od strane CIK BiH djelimično usvojen, odnosno nije usvojen dio zahtjeva koji se odnosi na glasanje putem pošte. Zahtjeva da se zahtjev u potpunosti usvoji i proširi na brojanje u preostalim biračkim mjestima u ovoj izbornoj jedinici.

U odgovoru na žalbu, Centralna izborna komisija Bosne i Hercegovine predložila je da Sud predmetnu žalbu odbije kao neosnovanu.

Ispitujući pobijanu odluku u okviru žalbenih navoda vijeće Apelacionog odjeljenja Suda Bosne i Hercegovine je zaključilo da **žalba nije osnovana**.

Centralna izborna komisija Bosne i Hercegovine, je u konkretnom slučaju, naredbom broj: 05-1-07-11-1934-10/20 od 09.12.2020. godine naložila Glavnom centru za brojanje da izvrši brojanje glasačkih listića sa redovnih biračkih mjesta i utvrdi rezultate, između ostalog, i za biračka mjesta navedena u zahtjevu za ponovno brojanje podnosioca žalbe. Prema stanju u spisu, pravilno je utvrđeno činjenično stanje da za osnovnu izbornu jedinicu Gacko (164) ima ukupno 526 birača registrovanih za glasanje putem pošte. Prema izvještaju Glavnog centra za brojanje CIK BiH od 4.12.2020. godine, broj neuručenih pošiljki birača registrovanih za glasanje putem pošte za izbornu jedinicu Gacko je 66. Isticanje u zahtjevu za ponovno brojanje, da je od strane simpatizera i aktivista političkog subjekta SDA dobijena informacija da su trebali dobiti više glasova putem pošte nisu relevantan dokaz zbog kojeg bi CIK BiH imao osnova da naredi ponovno brojanje glasačkih listića prispjelih putem pošte, te je zasnovana na pretpostavkama i uopštenim tvrdnjama koji nisu dokumentovani relevantnim dokazima.

U pogledu dijela žalbe kojim se traži ponovno prebrojavanje na svim biračkim mjestima, tj. I u onima koja nisu navedena u prvobitnom zahtjevu za ponovno brojanje, CIK BiH je pravilno primijenio materijalno pravo, odnosno odredbu člana 3. stav (1) Odluke o utvrđivanju i objavljivanju rezultata Lokalnih izbora u Bosni i Hercegovini 2020. godine broj: 05-1-07-1-13333/20 od 05.12.2020. godine, gdje je preključivni rok za podnošenje zahtjeva za ponovno brojanje bio 08.12.2020. godine.

S obzirom na navedeno, po ocjeni ovog vijeća, pobijana odluka Centralne izborne komisije Bosne i Hercegovine je pravilna i zakonita a žalba neosnovana pa je istu, primjenom odredbe člana 81 stav 1 Zakona o upravnim sporovima Bosne i Hercegovine (Sl. glasnik BiH br. 19/02 do 74/10) valjalo odbiti.

**PREDSJEDNIK VIJEĆA
S U D I J A
Zvezdana Antonović**